

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Dampa bial bye election a naktuka vote thlak turin ruahmanna engkim peihfel a ni tawh.
- 2. Mizoramah lirthei khalhtuten dan an zawm that avang leh traffic buailo thei ang bera lirthei khalh an chin avangin Mizoram state chuan Traffic Management Special Award a dawng.
- 3. Bihar Assembly inthlan thawhnhnihna naktuka neih tur atan engkim peihfel a ni tawh.
- 4. India leh China inkara khualzin phur thlawhna chu vawiin atangin chhunzawm a ni

<><><>

DAMPA PREPAREDNESS

Dampa bial bye election a naktuka vote thlak turin ruahmanna engkim peihfel a ni a, polling station 41 a inthlan buaipuitu tur -polling party te chuan vawiin tlai dar 3 leh minute 15 khan an duty na tur hmun an thleng kim.

Tukin khan polling station 35 a duty tur polling party te chu lirthei 39 hmangin an duty na tur lam panin Mamit DC complex Election Office kawt atangin an chhuak ve leh a, nimin khan polling station hla zual 6 a duty turte an lo chhuak tawh bawk a ni.

Mamit Election Officer Pu Lalnunfela Chawngthu chuan Dampa bial bye election lo awm tur a inthlan buaipuitu tur polling party ten thlen kim tawh thu sawiin a thleng hnuhnung ber te hi Zopui polling station a duty turte niin an ni hi nimin khan chhuak tawhin nizanah Parvatui khuaah riakin vawiin lamah ke in Zopui khua hi an pan leh a ni a ti.

Mamit Election Officer chuan naktuk zing dar 7 atangin tlai dar 4 thleng vote thlak tur a ni a, hemi zawh ve leh hian polling party te chuan Mamit DC office lam an rawn pan nghal ang a ti a, an lo thlen ve leh an bungrua te chu strong room ah dahluh a, november ni 14 vote chhiar hma chu venhimna khauh tak hnuaiah dah that an ni dawn a ni a ti.

BYTE: Mamit Election Officer

Hetih lai hian Dampa bial bye election security nodal officer, Mamit Addl SP Pu Lalchhuanawma Chhangte pawhin Dampa bial bye election chu boruak muanawm leh fel fai taka an neih theih a beisei thu a sawi a, venhimna an uluk thu sawiin Dampa bial bye election atan hian Mizoram Police nasa takin an inpuahchah a, boruak ralmuang tak a mipui ten vote an thlak theih nan polling station tinah police an duty a, boruak duhawm lo thleng thei veng turin sector police officer te, flying squad te, Static surveillance team te, Naka check post te leh QRT te an indah thu a sawi bawk.

<><><>

CM

Chief Minister Pu Lalduhoman College of Veterinary Sciences & Animal Husbandry, Central Agriculture University (Imphal), Selesih din cham kum 27 na lawmna a hmanpui a. He college campus chhunga sak thei leh thlai thianghlim dan endikna Pesticide Residue Analysis Laboratory a hawng nghal a ni.

Thusawiin Chief Minister chuan, Pesticide Residue Analysis Laboratory chu All India Networks Project on Pesticide Residue hnathawh nan chauh ni lovin state chhunga loneitute tan leh thlai lakluhte endikna atan a tangkai thei dawn a ti a. Vantlang hriselna tha tawh an neih theihna atana hmanraw pawimawh a ni a. Zirlai leh zirbingna neite tan a tangkai hle bawh ang. Mizoram tan hmasawnna chhinchhiahtlak a ni, a ti.

Foundation day lawmna hi College Auditorium-ah buatsaih a ni a. Horticulture Minister Pu C. Lalsawivunga leh Agriculture Minister Pu PC Vanlalruata te pawhin he hun hi an hmanpui a ni.

He college ah hian zirlai naupang 440 an awm mek a, kum 1997 a bul an tan atanga chhiarin tun thlengin BVSc & AH Graduate naupang 891, Post Graduate 378 leh Ph.D 15 an zirchhuak tawh a ni.

<><><>

PM POSHAN

Kum 2025-26 atan Mizorama sawrkar primary school leh middle school zirlai 1,29,285 hnenah chaw chhun, midday meal (PM-POSHAN) sem a ni.

School Education department hnuaia PM-POSHAN hotute hnen atanga Akashvani News Aizawl thudawn danin, sawrkar kum kal mekah hian Mizoram sawrkar hnuaia sikul 2,507-a zirlai 1,29,285 hnenah chaw chhun sem a ni a, Pre-Primary School zirlai 22,960, Primary School zirlai 70,017 leh Middle School zirlai 36,308 an ni. Central-in a ruahman ang chuan chaw chhunah hian Primary School zirlai naupang pakhat tan ni khatah Rs 6 point 11 leh Middle School zirlai naupang pakhat tan Rs 8 point 35 zel dah a ni a, an chawhmeh turte hi Dietitian-te'n an ruahman thin a ni.

Sawrkar laipui chuan eisiaamtute hlawh tur first intalment a rawn pek tawh thu PM-POSHAN hotute chuan an sawi a, first instalment hian April - June thla hlawh

pek an ni a. Sawrkar laipui hian Mizoram sawrkar hnenah second instalment tur a rawn pe tawh a, tunah hian state sawrkar kutah la awmin, state sawrkarin a pek chhuah veleh eisiamtute hlawh hi pek chhunzawm theih a nih dawn thu an sawi.

Buhfai leina, phurhna leh a kaihhnawih thil dang chu central-in za-a za a rawn tum a, chawhmeh man leh cook-cum-helper hlawhte chu central leh state sawrkarin an intum sem thung tih an sawi bawk.

Kan corr report lo ngaithla ang.

(Voice Cast - *PM-POSHAN hotute chuan sawrkar laipuiin second instalment tur sum chu Mizoram sawrkar hnenah an pe tawh a, mahse, Mizoram sawrkarin ala pek chhuah loh avangin eisiamtute hlawh tur hi kumin June thla thleng chauh an la pek thu leh chawhmeh man pawh kumin May thla thleng an sawi. Sawrkarah file an thehluh tawh thu sawiin PM-POSHAN hotute chuan, chhanna erawh an la dawn loh thu an sawi a, second instalment-a sum awm atang hian eisiamtute hlawh tur leh chawhmeh man an pek hmabakte pek tur a nih rualin, engtik thla thleng nge pek theih a nih dawn an la hriat loh thu an sawi bawk. - Johny Lalrinchhana, Akashvani News Aizawl*)



URBAN MOBILITY INDIA- SPECIAL AWARD

Mizoramah lirthei khalhtuten dan an zawm that avang leh traffic buailo thei ang bera lirthei khalh an chin avangin, 18th Urban Mobility India 2025 Gurugram, Haryana a neih ah Mizoram state chuan Special Award a dawng a,

Mizoram Traffic Management System Special Award hi Union Minister Manohar Lal leh Union Minister of State Tokhan Sahu, ten d’ an hlan a. Mizoram sawrkar aiawh in UD&PA Secy Pu Lalmalsawma Pachuau leh a thawhpuiten an dawng a ni.

Urban Mobility India Conference hi Ministry of Housing & Urban Affairs hnuaiah Institute of Urban Transport(India) in kum tin huaihawt thin a ni a, He Award dawng tur hian Award Selection Committee-in presentation nei tura a hriattir ang in, Town & Country Planning Wing, UD & PA Deptt chuan Video Presentation bakah PowerPoint Presentation an pe a. Mizoram ah traffic rules tha taka zawm a nih dan te, mipuiin dawh thei taka traffic buai nuai nuai lova an tlan thin dan te, tul lo ah horn hmehrik a nih ngai loh dan te tarlan niin Aizawl chu Silent City tia sawi thin a nih thu te tarlan a ni bawk.

He an Presentation pek zulzui hian Award Selection Committee chuan Central Ministry ah recommendation pe in Mizoram Sorkar aiawhin UD & PA Department a hotuten an dawng a ni.



TOURISM

New Delhi-a cham mek Minister of State, Tourism Department Pu Lalnghinglova Hmar leh NITI Aayog Member Dr. VK Paul te chu vawiin khan New Delhi-a NITI Aayog Headquarters-ah an inkawm a,

Mizoram tourism hmasawna'na NITI Aayog leh Mizoram sawrkar hmalakna tur sawiho zingah Mizoram Tourism Conclave buatsaih a tel a. Stakeholder tam zawk an tel theihna tur leh, Mizoramin a hlawkpui theih tura ruahmanna siam nise tih a ni. Hemi chungchang bika hmalatu tur 'Task Force' din a, a ranglama a hun tihchian theih nise tiin rel a ni. New Delhi-a 'Mizo Day' hman chungchang sawiho a ni bawk.

NITI Aayog leh Mizoram sawrkar tangkawp chuan November 24 ah Mizoram sawhthing tharchhuah chungchanga inrawnkhawmna, 'Stakeholder Consultation on Ginger Produce for Mizoram' tih chu New Delhi-ah neih a ni dawn a. He hun hi Mizoram Chief Minister Pu Lalduhoma'n a telpui dawn a, sawrkar official bakah industry, zirna in leh organisation tam thei ang sawm an nih tur thu meeting-ah tarlan a ni. Hemi zulzuia sector dang - a bikin tourism - a programme siam chungchang ngaihtuah ho a ni bawk.

Hetihlai hian, Tourism department in Mizorama tourist service provider-te hnen atanga khualzin awm zat an chhinchhiah danin kumin August leh September thla chhung khan Mizoramah khualzin 1,27,458 an awm.

Tourism department hotute sawi danin, August leh September thla chhunga Mizorama khualzin rawn lutte hi ram dang mi, foreigner 2,208 leh India khua leh tui (domestic tourist) mi 1,25,250 an ni a; Aizawl district-in khualzin dawng tam berin mi 75,461 a dawng a ni.

Kan corr report lo ngaithla ang.

(Voice Cast - Tourism department hotute chuan tourist rawn lut zat hi hotel leh a kaihhnawih khualzinte thlenna hmun te, khualzinnte hmun tlawh thin te leh Mizoram luh leh chhuahna hmun hrang hrang atanga lakkhawm a nih rualin, heng hmun hrang hrangte hian khualzin an dawnawm zat hi thla tin an thehluh loh thin avangin khualzin rawn lut zat hi tuna data an neih mek ai hian a tam zawk an rin thu an sawi a; hotel leh a kaihhnawih 128 atangin September thla khan data an lakkhawm laiin August thla khan hotel leh a kaihhnawih 135 atangin data an nei thung a, hei vang hian September thla aiin August thlaah khualzin rawn lut zat an chhinchhiah tam zawk thu an sawi. Khualzinte pan thin hmun hrang hrangte hian Tourism department-ah tha takin data pe thei thin se an duh thu an sawi bawk a ni - Johny Lalrinchhana, Akashvani News Aizawl)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

BIHAR ELECTION

Bihar Assembly inthlan thawhnhnihna atan engkim peihfel a ni tawh. Inthlan thawhnhnihnaah hian district 20 huamchhunga Assembly bial 122 ah vote thlak a ni dawn a. Voter vaibelchhe 3 leh nuai 70 chuangin an aiawha rorel tur an thlang dawn a. Candidate hi an vaiin 1302 awmin an zingah hian hmeichhia 136 an tel a. Zing dar

7 atangin vote thlak tan a ni ang a, tlai dar 6 thleng vote thlakna hun hawn a ni dawn a. Assembly bial 7 bikah chuan tlaidar 5 ah vote thlak hun khar a ni ang. Polling station 595 chu hmeichhiate vil tur bika ruahman a ni a. Polling booth 21 chu pianphunga rualbanlote enkawl tura dah a ni bawk a. Model Polling station hi 316 siam a ni. Tun tum inthlanah hian candidate langsar zingah Chief Minister Nitish Kumar te, JD(U) hruaitu hlun leh State Power Minister nilai Bijendra Prasad Yadav te an tel a. Bihar Assembly inthlan vote tla te hi tun thla ni 14 ah chhiar a ni ang.

<><><>

INDIA- CHINA

India leh China inkara khualzin phur thlawhna chu vawiin atangin chhunzawm a ni a. New Delhi atanga thlawk passenger hmasa ber te hi Sanghai-a Indian Consul General Pratik Mathur chuan alo hmuak a. Kum nga hnuah ram pahnih inkara direct-a thlawk khualzin thlawhna chu chhunzawm a ni leh ta a ni. Indian Consulate chuan social media ah hemi chungchang hi tarlangin India chu khawvel hmun pawimawh a ni chho zel tih sawiin ramdang mite nena inkungkaihna a thang chho zel tih an tarlang a ni.

India leh China inkar thlawhna thlawk hi kum 2020 a Covid-19 hrilen avang leh ram pahnih inkara boruak tha lo avangin tihtawp a ni.

<><><>

BADMINTON

Ni 2 awh Veteran Badminton inelna, ni 8 leh ni 9 chhunga Guwahati Smashers Club in TRP stadiuma an buatsaihah Mizoram aiawha chhuak ten title an hlawhchhuak tha hle a.

Mens doubles ♣ Category 75 ah
M. Joseph & Zarkima (Mizoram)

♣ Category 85 ah
Zarzokima & Lalmuanoma (Mizoram)

♣ Category 95 ah
Lalrindika & Lalmuanoma (Mizoram)

♣ Category 105ah
Lalmuanoma & Ramzava (Mizoram)

♣ Category 115
Ganesh Chand & Uttam (Nepal) te an chak a, heng team te hian trophy, certificate leh cheng sing 2 an dawng a ni.

<><><>